

宦蹟

郝參軍言處則為遠志出則為小草豈出不如處亦或負其夙志者多耳若乃立朝著蹇諤之節處變盡匡濟之力臨民莅事各有成勞雖職任之崇卑大小不同而其體國愛民之心則一也舊志所錄尸祝在當時風徽流弈世大都皆不急功不近名本實心以行實政者茲更博蒐六十年間補所未備既用彰往亦以勵來茲云爾

晉

雷煥妙達象緯初斗牛間常有紫氣及吳平紫氣愈明張都陽縣志

卷十三

宦蹟

華邀煥登樓仰觀煥曰寶劍之氣上徹於天耳乃補煥為豐城令掘獄入地四丈餘得一石函中有雙劍並刻題一曰龍泉一曰太阿其夕斗牛間氣不復見煥取南昌西山北巖土以拭劍光芒艷發因遣使送一劍并土與華留一自佩或曰得兩送一可乎煥曰本朝將亂張公當受其禍此劍當繫徐君墓樹耳靈異之物終當化去不永為人服也華得劍愛之嘗置坐側華以南昌土不如華陰赤土報煥書曰詳觀劍文乃干將也莫邪何復不至雖然天生神物終當合耳因以華陰土一觔致煥更以拭劍倍益精明華誅失劍所在煥卒子華為州

從事持劍行經延平津劍忽於腰間躍出墜水使人沒水取之不見但見兩龍各長數丈蟠繞有文章沒者懼而返須臾光采照水波浪驚沸於是失劍華嘆曰先君化去之言張公終合之論此其驗乎晉書張華傳

按前志例云雷豐城妙達象緯晉書載張華傳無可類附特目卓識表之本自絕能難於儼已劉司空固不為無見然一人為類太覺孤騫且雷於豐城為名宦之首則疑當日俎豆馨香必有出於望氣博物之外而史不盡傳者今特改入宦蹟至其卓識無傳覽者又未嘗不可自得之也

鄱陽縣志

卷十三

宦蹟

二

南唐

李德柔字予懷性鯁直不阿仕南唐為大理寺卿時元宗欲置北寺獄諫曰世豈乏士使閹寺得弄文墨邪議遂寢

李延鄒為滁州錄事參軍時周世宗盡取淮北州郡滁州危急團練使郭廷謂欲降命延鄒草降表延鄒責以忠義廷謂以兵臨之延鄒擲筆曰大丈夫終不負國為叛臣作降表廷謂殺之唐主命其子以官

宋

彭汝礪字器資舉進士第一歷幕府十年處之澹如王安

石得其所著詩義善之以為國子直講擢太子中允尋
改監察御史裏行汝礪首陳十事曰正本任人守令理
財養民賑興事變苗役鹽法等事指摘利害多人所難
言者王中正李憲臨邊汝礪曰漢唐以兵付中人多致
敗事神宗折之拱立不動伺間復言神宗卒為改容罷
為江西轉運判官陞辭言今不患無將順之臣患無諫
諍之臣不患無敢為之臣患無敢言之臣久之代還為
京西路提點刑獄元祐中拜中書舍人會吳處厚繳進
蔡確詩諫官文章請治汝礪曰此羅織之漸也上疏論
列已而確有謫命汝礪遂罷知滁州召為兵部侍郎徙

鄱陽縣志

卷十三

宦蹟

三

刑部會有巨獄汝礪以為不可殺與執政異徙禮部又
徙吏部紹聖初進尚書言者謂汝礪附會劉摯罷為寶
文閣直學士知成都府以疾辭知江州卒年五十四遺
表云土地已有餘願撫以仁財用非不饒願節以禮佞
人初若可悅而其患在後忠言初若可惡而其利甚溥
忠義之氣至死不衰所著有易詩義各十卷奏議詩文
五十卷號鄱陽集弟汝霖歷官顯謨閣待制汝方見本
傳

胡涓字霖鄉靖康進士丞遂昌縣以生民利弊為念縣治
距溪不數步而儒學切近其側每霖雨溪流漲溢則隄

湍齧害涓因訪舊龍圖張根所築隄址而修甃之身自董役隄成百姓蒙其利

劉定字子先皇祐間進士幼警敏有聲歷中書舍人右文殿修撰集賢學士吏部尚書出知陳廬二州有政績

元

李楫字濟川大德間自袁州路經歷遷臨江新淦州判官時朝命使者巡行郡國至臨江官吏皆受譴責獨稱楫善遂遣楫詣安福永新糾出吏賊萬計任淦六年長於聽斷每得隱情委讞隣州縣疑獄多所平反人稱明允吳文正為撰平反疑獄碑記見通志終江西行省照磨

鄱陽縣志

卷十三

官蹟

四

周應極字南翁生有異質弱冠遠經史製書謁部使者姚燉燉奇之薦授婺源學正棄官歸養及喪免姚燧王約劉敏中程鉅夫薦召見獻皇元頌擢翰林待制皇太子說書調集賢司直尋改待制出同知池州事無留滯覈賦金之羨者還民著為例英宗踐祚以舊臣召見勞問呼學士不名未幾卒著有拙齋集二十卷兄應奎字明翁任饒州路治中饒穀宜私而輸以杭須轉糶他境應奎謂任土作貢屢請於行省得以私輸民便之

屈殷字子申總管狄師聖辟為曹掾以集賢待制李粲薦策試優等特除秘書丞乞便養改信州知事才明決信

守王直號良吏事每咨於殷御史撤里不花張士弘考信群吏嘉殷清苦交薦其賢尋卒

周伯琦字伯溫父應極至大間為翰林待制伯琦自幼從宦遊京師入國學為上舍生積分及高等去以蔭授將仕郎南海縣主簿三轉為翰林修撰改宣文閣授經郎教戚里大臣子弟每進講輒稱旨帝以伯琦工書法命篆宣文閣寶仍題扁宣文閣及摹王羲之所書蘭亭序智永所書千文刻石閣中嘗呼其字伯溫而不名會御史奏風憲宜用近臣特命僉廣東廉訪司事八年召入為翰林待制預修后妃功臣列傳累陞直學士除兵部

鄱陽縣志

卷十三

宦蹟

五

侍郎與貢師泰同權監察御史兩人皆南士之望一時榮之遷崇文太監兼經筵官出為江東肅政廉訪使長槍鎖南班陷寧國伯琦與僚佐倉皇出走至杭州除兵部尚書改浙西肅政廉訪使丞相達識帖睦爾承制假伯琦叅知政事招諭平江張士誠留平江者十餘年士誠既滅伯琦乃得歸鄱陽尋卒伯琦儀觀溫雅粹然如玉雖遭時多難而善於自保博學工文章而猶以篆隸真草擅名當時嘗著六書正譌說文字原二書又有詩

文藁若干卷

元史

按伯琦所著名近光扈從集今尚有刻本其子克

復亦工篆隸書法

明

祝挺字正夫攻春秋左傳明初趙伯仲鎮饒辟為叅隨尋除金壇縣丞使蜀還遷上海知縣時海濱盜起大姓錢鶴臯因煽亂率眾逼縣治挺揣烏合必潰自為教密遣人布告長里者曰順逆禍福人自取之有能從我擒賊者上汝功於是父老匿備械大艘中渡挺黃浦東植義旗率眾聽約束皆嚙指誓逆黨亦投戈伏旗下請死餘奔海復謀叛挺遣唐翼等追斬之適謀報驃騎巴克松江將屠上海挺即函二首獻俘馳告曰賊擒邑復民已

鄱陽縣志

卷十三

宦蹟

六

定矣無煩大兵驃騎不聽猶欲窮治脅從者挺曰彼誑誤者何罪不則仍罪我遣吏報克復功於相國事乃已時他邑死傷相枕藉而上海獨晏然民感之立碑楊維禎繫之辭曰海之虞海嘯呼海弗虞導歸靈而尾閭大夫度也海如大夫之德海涵濡千蛟萬虺起須臾一蛟得萬虺化為魚嗟嗟兮大夫神明予父母予挺馭民未嘗厲聲色事來剖決如神平生慕諸葛武侯韓魏公之為人凡遇所當為即慨然以前不計禍福擢戶部主事調浙江行省郎中以事去官卒

費震博學多才洪武初以賢良徵授休寧典史歷吉水知

縣四年擢漢中知府歲歉盜起震發粟賑濟盜乃來歸
即令占宅自保遂得數千家後以事被逮朝廷以震良
吏釋之為牧民者勸尋以善政陞戶部左侍郎晉尚書
十二年奉旨定丞相御史大夫等官歲祿之數刻石官
署調湖廣布政使後以老致仕

張琬字宗琰洪武初以貢入太學試高等授給事中明年
調戶部主事一日上問天下財賦戶口之數琬口對無
遺帝悅立擢戶部左侍郎謹身殿災上疏言時政帝喜
賜文綺歲飢請蠲民租百萬餘石俱見嘉納琬才敏有
心計年二十七卒於官時人惜之

明史

鄱陽縣志

卷十三

宦蹟

七

章復字彥復仕元歷行省檢校洪武元年下湖湘得百粵
地擇守令首簡復授全州府同知全民不事農復身為
之勸猶慮戒諭不能遍為編農圃通諭一卷凡地利不
興者分時月別以品類若栽蒔斂蓄及諸禳法療方織
悉具述家給之又慮惰民不能振起述湘謠十章俾歌
之相率鼓舞興學校選俊秀擇師分教再值旱蝗徒跣
詣覆釜山叩禱輒應民勒石頌功全故闕守六年即陞
復為守先後得專理有成效凡三閱考嘗樹松夾道百
里以憇行人至是陰可覆路行者呼章公松尋改全為
州移知保寧府逾年乞致政特恩與乘傳歸復器宇凝

重學問該博尤工篆隸性孝友居官清介卒年八十六後子洪貧無以居郡守周易為營屋一區處之

金良佐幼好學博通經史洪武十五年詔求賢才邑令以良佐應詣京陛見上咨問備至奏對稱旨拜廣東右布政使十八年被召入京卒

蔣惠字貴和明太祖征陳友諒於鄱陽惠上書謁見遂留參政務洪武元年授廣東行省左司員外遷禮部郎中坐事左遷華亭知縣時舊令誣伏平民李秀三等二十人為盜惠察其枉悉釋之密投捕兵方略獲真盜馬鬣子八人正其罪民頌之後以鈔本事去官

鄱陽縣志

卷十三

宦蹟

八

翁仲祥幼負才氣同蔣惠上書謁軍門留參政務監漕江淮間轉餉數千里賴以不匱洪武三年擢工部營繕員外郎八年領工匠營治鳳陽陵寢踰歲卒於官

孟常字德常幼有志操洪武二十七年詔求才幹邑令以常應授蘇州崑山知縣未幾舊令來代改知池州建德邑有蘆束及秋苗逋負累歲徵之不能具常詣闕懇陳得以鈔代輸民感悅部使者言其失職因謝歸永樂元年仍起知建德累考書最留從事秋官調知真定之涑水後致仕卒年八十一

莊叔淵貌魁梧負才器有詩名性好遊上會稽浮河洛抵

閩海而返趣益高聞見益廣洪武中例歲貢才能一人
邑令任勉舉叔淵銓曹每試高等授蘇州通判尋調寧
波皆能其官永樂四年求賢詔下寧波復以叔淵應陞
知府提調交趾金冶事踰二年疾卒

賀祖嗣字思恒永樂九年進士授刑部主事歷郎中擢行
在大理少鄉為人廉介寡言笑精法律任棘寺一十九
年讞鞠明允漢府以逆受誅議屠所部祖嗣力言乃止
正統九年出知光州尋致仕年六十九卒孫霖字時望
成化己丑進士歷官蘇州知府廉明有聲卒於官

劉莘字志尹永樂間進士授行人奉使歷齊魯閩蜀閔陝

都陽縣志

卷十三

宦蹟

九

足蹟遍天下宣德十年遷儀制員外調考功郎汰官吏
六百餘員稱旨擢福建叅議奏減課銀幾半調山東築
河隄數千丈議築臨清城十里投資治少尹為人淳厚
通達累仕六朝多著勞蹟景泰二年致仕歸二十餘年
卒

劉城字廷高父烈永樂庚子鄉舉授翰林院孔目選監察
御史釐川用兵簡督饋餉知大理府擢本省叅政有才
名城長幹多髯美丰儀自少磊落有大志景泰間領順
天鄉薦選授監察御史俵馬直隸山東河南巡按鳳陽
陝西督餉貴州雅著風裁陞福建按察司副使上杭盜

起詔起都御史高明勦之高興疾以兵事屬城城深入
大捷梟渠魁散脅從請立巡司又擇其秀者充生員次
充吏使漸染於化高備疏其績歷陞按察使廣西右布
政使右副都御史巡撫河南未幾卒於官中州士民號
送賜祭葬如例

胡奎字星燦永樂甲午舉人任蘄水知縣歷陞黃州知府
凡七年政尚寬厚為民興利務在富之勤於勸農暇則
訓校諸生多興起者

湖北名宦志

程善字本善永樂間鄉貢授舒城知縣多惠政民德之以
父憂去舒人詣闕疏留服闋復任舒再歲丁內艱舒人

鄱陽縣志

卷十三

宦蹟

十

留如前詔允之如期起原官前後歷十八年秩滿又留
進知州掌舒城縣事善勤慎仁愛與物無忤人稱為長
者兩自舒還蕭然一橐居宇不蔽風雨處之裕如

張蟾明時為四川忠州守廉介剛直時中官採木蜀中大
肆貪暴沿江諸郡為之騷動蟾擒其僕從將劾之中官

懼請謝引去

四川名宦志

王弼字廷輔宣德八年進士正統間授戶科給事中歷兵
科都給事累上疏言時政會歲饑請蠲逋負再三諄切
得允陞順天府丞修山海居庸邊防有區畫進應天府
尹累疏乞歸卒於家

葉冕字拱辰正統進士授南京刑部主事擢知松江府廉
明公正鋤強植弱民畏而服之時連歲饑饉冕悉力賑
救賴以全活者甚衆府有澱山湖其半屬崑山界湖堤
壞彼此莫肯修冕概視之為築萬餘丈蘇人愧之秩滿
陞山東叅政晉副都御史致仕 通志

劉濟字時用正統進士授兵部主事陞郎中在武庫著清
操改吏部郎中孜孜以汲引為務惟恐遺才進左通政
預知制誥莊重典雅一時文名煥發在兵部時差山東
巡視德澤下流民瘼以瘳吏部時兩典會試盛稱得人
又疏請封生母詔許其孝時為異數

鄱陽縣志

卷十三

宦蹟

十一

胡鐸字文振六十六都人天順壬午舉人嘉靖間知四川
綦江實心愛民催科不擾一錢不入私囊卒於官貧莫
能歸喪殯於城南士民哀之 四川通志

童軒字士昂世居文北鄉父玉壺以精天官學克欽天監
天文生徙家南畿軒登景泰辛未進士授南吏科給事
中上疏請省冗員公考察倡武勇擇師儒杜倖進恤京
民悉見採納英宗復辟上疏言弭盜安民數事尤切時
弊改戶科給事中同考會試得倪公岳輩十數人時稱
得士憲宗踐祚首上疏言帝王之治在先本而後末隆
聖德用賢才納忠諫愛小民謹邊備為本而簿書刑名

其末也優詔答之四川盜起廷議軒才識足任馳至賊巢宣布朝廷恩威賊羅拜以降進都給事中言安盜賊有五去貪官均科差蠲逋負革總督省邊運而盜自息明年賊復猖獗委登於軒請壽昌知縣六年擢雲南提學僉事敦本為教士風丕變召拜太常寺少卿進本寺卿以都察院右副都御史提督松藩軍務疏言松茂戍守甚艱宜調兵設衛守之四處要路各設倉以便轉輸凡八害三利條畫以聞擢南京吏部侍郎晉禮部尚書三疏懇求致仕卒贈太子少保軒博覽工詩文精父歷學嘗署欽天監論駁歷元歲差法甚悉所著有清風亭

稿枕肱集海岳涓埃論蜀蒙籌邊錄夢徵錄各若干卷藏於家

胡韶字大聲振祖曾孫也登成化甲辰進士授工部都水主事權稅荆南改刑部四川司主事署員外郎陞浙江司郎中錄囚於浙多所平反有審刑錄傳於世丁巳出知嚴州首疏六縣輸稅請銀絹兩收朝議是之賦足而民稱便嚴俗婚姻尚侈靡貧者多不能娶韶厲禁約俗因以變又親死多用火鑿韶為廣置義塚於是貧者始得掩骼埋胔各郡有疑獄不決者當道悉委審理皆得其情泣嚴八載陞湖廣叅政正德戊辰連丁內外艱服

闕補廣西左叅政尋陞湖廣右布政時逆瑾擅權毒害
衣冠凡誣誤者令輸粟贖罪察友有貧不能贖者韶以
羨金助之甲戌陞福建左布政使冬入為順天府尹戊
寅擢刑部右侍郎與藁城張公同心讞決輕重惟允嘉
靖元年疏懇致政家居二十餘年日與故舊詩酒相娛
不道時事鄉人愛其和易嘉靖乙酉縣志韶所修也會
九廟成詔有司以禮問勞郡守為建坊以表之卒年八
十有七贈刑部尚書謚康簡

彭程字萬里一字憲卿成化末進士弘治初授御史巡視
京城降人雜處畿甸多為盜事發則投戚里奄監為窟

鄱陽縣志

卷十三

宦蹟

十三

穴程每先機制之有發輒得巡鹽兩浙代還巡視光祿
五年上疏言臣適見光祿造皇壇罷皇壇者先帝修齋
之所陛下即位此類廢斥盡何復有皇壇煩置罷光祿
金錢悉民膏血用得其當猶恐病民况投之無用地頃
李孜省繼曉輩倡邪說而先帝篤信之者意在遠希福
壽也今二人已伏重辟則禍患之來二人尚不能自免
豈能福壽他人倘陛下果有此舉宜遏之將萌如無請
治所司逢迎罪帝初無皇壇造罷之命特光祿姑為脩
帝得程奏大怒以為暴揚先帝過立下錦衣獄給事中
叢蘭亦巡視光祿繼上疏論之帝宥蘭奪光祿卿胡恭

等俸付程刑部定罪尚書彭韶等擬贖杖還職帝欲置之死命繫之韶子復疏救程子尚三上章乞代父死終不聽是時巡按陝西御史嵩縣李興坐酷刑同繫獄及朝審上與及程罪狀詔與斬程及家屬成隆慶文武大臣英國公張懋等合疏言興所斃多罪犯不宜當以死程用諫為職坐此成邊則作奸枉法者何以處之尚書王恕又特疏救乃減興死杖之百偕妻子戍賓州程竟無所減程母李氏年老無他子叩闕乞留侍養南京給事中毛珵等亦奏曰昔劉禹錫附王叔文當竄遠方裝度以其母老為請得改連州陛下聖德非中主可比而

程罪亦異禹錫祈少矜憐全其母子不許子尚隨父戍所遂舉廣西鄉試明年帝念程母赦還其後劉瑾亂政追論程巡鹽時稍虧額課勒其家償程死久矣止遺一孫女罄產不足則並女鬻之行道皆為流涕

明史

彭誠字君實四十四都人領成化丙午鄉薦中弘治庚戌錢福榜進士歷官禮科給事中出補福建僉事以清介著

張岐字宗周成化壬戌進士知貴池縣廉幹有聲調華亭陞刑部主事改南京工部歷員外郎郎中督蘆課不為勢豪所侵額賦以足權廣東叅議平生鯁直寡言凡義

舉赴之恐後睦婣族好施予若天性然

俞緇正德戊辰進士歷官監察御史按察使僉事巡按四川逐貪污舉廢墜當逆瑾擅權時獨持風裁如緇者不多見云 四川名宦志

詹珪字朝章正德丁丑進士由水部郎中嘉靖八年陞建寧知府愿恪公勤有斷有守剏漏澤園行古冠禮先是兩衛預備倉穀歲久坐累軍斗珪請以易月糧而抵銀在官人甚便之善政不可殫書不事表襮去後民追思樹遺愛碑於名宦祠官終貴州副使 萬姓統譜

劉錄字世臣號亭湖父城巡撫河南終於任錄年十二

鄱陽縣志

卷十三

宦蹟

十五

喪南歸執禮如成人十五補郡庠弘治辛酉舉於鄉肄業南雍聲震六館嘉靖癸未第進士初令贛榆洗冤獄甦飢民著有異績乙酉以賢調浙之平陽時處有礦賊猖獗大兵討之不克錄請釋兵獨任其事有土民葉光者能制賊錄抵其家諭之光感激用命乃導民兵擊賊城中惡少多為賊應錄計敗其謀賊遂殲焉又突有海賊十七艘揚颿入寇錄督兵禦之親挽弓殪二人賊駭遁去尋遷刑曹轉工部都水司郊禮成覃恩進階承德郎時年五十六遂致仕錄為人體貌脩偉個儻有奇節孝友天至人咸慕之家居十載始卒所著有亭湖稿正

德間崑修郡志又纂贛州慶陽并萬年諸志別有摺亭
集梓於平陽子洵戊戌南宮第二人歷官給事中廣東
倉事

陳文衡字惟平隆慶戊辰進士授仁和知縣陞刑部主事
改監察御史巡按宣大時代藩奪嫡事發或為賂庇文
衡執法不少貸會御史劉臺劾江陵被逮文衡大為歎
息有申救意同坐中馳告江陵江陵銜之尋端以御史
劉堯卿疏處賊吏不盡法追連文衡外調廬州推官久
之江陵敗由南京吏部郎中陞廣東副使備兵羅定時
羅旁初定悉心善後事開道濬河設官立學經畫一新

鄱陽縣志

卷十三

官蹟

十六

足跡遍險阻凡四年歷陞湖廣叅政山東按察使廣西
右布政使為人峭勁寡言笑持廉守正人不敢干以私
其督糧楚中巡撫李貞提改陳公澹水次兌軍於城陵
磯且議濬河泊船一時有司軍民咸謂不便文衡具晰
利害抗疏執奏且求解官部議是之歷官所在著聲及
齋捧卒於京年五十有九

以上劉志

羅元禎字汝符少與史運使桂芳姜司成金和讀書番君
廟即刻志勵行以遠大自期嘉靖丙午舉於鄉庚戌成
進士授推官以廉明稱尋擢河南道監察御史巡按江
南江南於前明為陪京習尚奢靡薦紳侈大時倭難方

急世廟又崇信老氏元禎蒞事彈劾權貴發摘奸伏并
疏嚴分宜招權納賂之狀造齊雲山劔羽流按論屬員
之藉金碧以殃民者風俗一清又條上禦倭方略民依
賴焉旋奉命兼巡兩湖鹽課課足而民不病當道交薦
其能賜勅嘉之有志在納忠器堪大受立朝而風紀振
揚按蒞而聲績咸著之語時胥謂當膺不次之擢分宜
嫉其夙嘗劾已調廣東提學副使較士清嚴不避嫌怨
所拔多知名士後守饒有惠政劉惠僑者大收童子中
所得孤寒也事竣擢雲南布政司叅議論止沐黔寧朝
覲張火藥一時風紀肅然尋引年致仕歸歿後舉祀鄉

鄱陽縣志

卷十三

官蹟

十七

賢張江陵柄國以宿憾汰之侯督學洞曾重舉入祠稱
其髫年植幹當路羽儀厲冰稜以為清干雲嵐而直上
立朝則抗節於袁州父子建藩則緝拒乎黔國沐公路
可埋輪山無採藿矜奸抉溝渠之術取士盡玉筍之班
當時以為實錄

劉應麒字道徵東隅人嘉靖甲子舉於鄉戊辰成進士選
庶常改授禮部主事時有富宗人重貲求繼親藩應麒
執不可當事者銜之出為廣東督學會沙汰例起應麒
格不行以疾告致仕三載起廣西督學陞四川叅政值
川北荒亂移檄賑濟賴以安輯遷湖廣臬長多所平反

尋擢浙江左右藩出納唯謹壬辰大計舉異等陞應天
巡撫吳俗間右巧避賦小民偏受其累應麒疏查限徵
不避權貴小民歡若更生以得罪豪右遂乞終養後復
起湖廣巡撫以親老不出旋丁外艱服闋起南大理卿
晉工部侍郎俱未赴轉兵部侍郎命下先旬日卒應麒
居官貞亮公忠有大節所至以清名嘗題吳廳事云來
時行李去時裝五夜清天一炷香畫得海圖留幕府不
將山水帶還鄉其廉介類如此居鄉杜門讀書留心經
濟如為邑中條議南北兌請免吳家坊水田丁差皆百
世之利嘗曰與鄉人處善善長而惡惡短其平易含弘
又如此

鄱陽縣志

卷十三

宦蹟

十八

閔址字蠡襟東隅人幼警異弱冠補弟子員萬歷庚寅歲
貢任興化訓導課文造士一時科名蔚起以特薦遷南
平縣令憂歸服闋補淮安沐陽縣抵任值運河淤塞上
發帑金八十萬遣重臣督理尚責印官疏之址相度經
營勞傷致疾閱歲河工告成擢高郵知州命甫下而卒
賜傳柩歸

江光斗字實卿弱冠入郡庠萬歷丙子以明經授豐城訓
導時士風漸偷斗以邑人徐匡嶽理學著名朔望迎至
彝倫堂發揚理蘊以風多士講畢復申明六條大義曉

示初學如是五載儒行漸趨於厚別駕吳興陶公來署
邑事精於形家以為人文湮抑乃文廟卑隘所致謀鼎
新之斗即捐俸為士民倡踰年登賢書者十一人成進
士者二遷安遠諭興學造士亦如昔時及解組歸里雅
望蔚然曾孫溥登順治辛卯賢書

胡繼美字中在萬歷進士初任東莞令以廉潔自持邑有
牛稅魚稅俱干計一文縣費一佐督監費騷取無時民
苦之繼美急裁縣費以抵督監且請著為令積困遂甦
舉卓異以外艱歸服闋補闕之漳浦勦盜賑飢厥勞更
著擢驗封主政歷考功稽勲文選三司郎中出典河南
鄱陽縣志

卷十三

宦蹟

十九

試最稱得人當時柄璫戚畹聲勢甚張卒能履險而不
罹於咎人服其智後乞假歸省踰年起大理左丞會丁
內艱以哀勞成疾卒祀鄉賢

程再伊字連叔萬歷戊戌進士授浙江蕭山令邑有北海
塘屆山陰會稽二封之中腴田萬頃每為潮汐所漂沒
再伊相度形勢捐俸折贖募民築堤越歲告成遂享灌
溉之利邑之東南有西興驛渡江流迅險先是皆私渡
舟人嗜利恒以重載及溺再伊設官渡於兩岸令其遞
相送迎往來藉以無虞秩滿晉儀曹居郎署十有一載
出補福建漳南監司擒海盜數十人商賈賴之未幾告

歸卒年六十三

史乘古字爾力桂芳孫性穎敏年十二即通六經大義為文不屬草弱冠入庠為守道葛寅亮所深器破格資給肄業鹿洞又周歷諸大儒間得其要領崇禎己巳拔入南雍棘闈屢薦復乙遂一意著述有但看警字榮列向直任通經老鄭元之句庚辰謁選授直隸寧津令邑承蹂躪之餘瘡痍滿目急訪諸耆舊更其不便於民者暇則進士民於庭諭以親上死長之義未幾有兵薄城下率屬士民為死守計躬冒矢石越三日夜兵引去當道上捍禦功於朝擢永平治中未任歸生平孝友天植初

鄱陽縣志

卷十三

宦蹟

二十

茹貧事母能守身以承其志後雖祿養而孺慕不衰歸田後嘗夜雨傳寇至躬與一蒼頭舉竹輿昇母避山谷崎嶇箐棘間達旦猶談笑相慰無幾微勞倦色性好成就來學多方訓迪疊疊不倦媼族中稍知向學者必委曲誘進之率爾所談皆成名理聽者俱有所感發興起一方好古之風至今未衰喪祭一衷古禮不用浮屠黃冠著有江州集瀛海紀事有獲堂詩稿難後草僑翁詩鈔以上盧志

詹時雨字霖臣東陽人為文古博沉蔚撫州陳大士艾千子咸推重之萬歷戊午舉於鄉崇禎甲戌成進士給事

中書科時上發策問兵餉條對稱旨擢監察御史出巡福建以嚴直忤權要遷蘇松道隨督學貴州一秉虛公得人最盛值鼎革之際藩臬缺官時兩兼理數職與督師何騰蛟同心協力積勞成疾卒於官歸裝只二篋坐具十二虎皮二而已

賀登選號澹餘崇禎甲戌進士由行人轉御史巡按江東明末政亂權要植黨徇私居言路者各陰有所左右登選指陳利弊不為依附國變後解組歸山屢薦不復出為人和平樂易最宜桑梓尤喜獎掖後進已雖貴不以名位自尊也所著有易辰六卷行於世

以上王志

鄱陽縣志

卷十三

宦蹟

二十一

國朝

王傳字紹薪康熙辛未進士由庶吉士歷官國子監祭酒丁外艱服闋以母老即請終養家居十五載養親課子外仍手一編為人沉靜不可干以私三校禮闈俱稱得士乙未視學山左嘗曰學臣清心寡欲不足異所難者衡才不爽尺寸耳優不濫中材絕倖獲心劣不苛令非才有容身地人服其公平雍正元年癸卯

特開恩科典試山左時大旱榜發甘霖立沛人稱為霖雨榜所取中多老成名宿又號先生榜復

命後眷注優渥恩賚稠疊

御賜講幄清班四字匾額年六十五卒于官雍正三年春
子祭葬崇祀鄉賢 通志

周邦楨字克生順治辛卯恩貢乙未試上等賜宴太和殿
投臨淮知縣淮為前明功臣湯沐邑舊例徵收有勲戶
陵戶民戶諸名色勲戶陵戶則土沃而賦輕民戶則土
瘠而賦重邦楨力請于上俾令畫一又邑臨淮水為南
北往來要津時奉文設立浮橋工費浩繁經營創造備
極勤勞蒞淮三載淮人德之相與咏歌彙為淮水謳吟
性廉介不以一毫妄取于民解組日囊橐蕭然饗殮不
給晏如也惟日携仲子燾與耆舊相唱和著有知非草

鄱陽縣志

卷十三

宦蹟

五

及避地鳴山等集

左有言字次立永平閩人康熙丁丑進士授河南汲縣知
縣明敏果斷凡遇疑獄多所平反尤精于衡鑒縣試所
首拔如景考祥竇容恂諸人後皆成名進士乙酉

聖祖仁皇帝西巡駐蹕衛輝召見行宮命題賦詩稱

旨溫綸獎賞記名擢用旋以疾卒于官士民為建左侯祠于

治西

陳冕字首人七歲即曉文義十歲喪父哀毀盡禮如成人
十四補弟子員二十三登己酉賢書屢上公車未第尋
授南康縣教諭日與諸生論文較藝益肆力于學丁丑

成進士知山東館陶縣事壬午分校鄉闈所得皆知名士又邑西河寨十餘村因漳水泛溢淹沒九載冕至捐俸開濬經營兩月水歸故道民得復業館人勒石紀其功德因名其河曰陳公河後因母老請終養母沒服闋起復赴部遘疾卒于京師

王允洪字禹範司成傳長子康熙乙酉舉於鄉授廣東潮陽知縣潮陽地濱海民多以漁為業出沒于驚濤駭浪中沉溺無算且海賊不時劫掠洪至置船數十艘艤停各汊更定漁人出海常期救生防患區畫周密所全活者甚衆報最陞刑部主事尋出知雲南姚州姚僻處萬

鄱陽縣志

卷十三

宦蹟

三

山險同劍閣民納糧賦輸輓維艱洪力請上憲以折色徵收著為定例民甚便之又地界迤西為入藏要道值軍興旁午民苦夫役乃捐俸置田助郵傳經費亦詳定規制杜絕官吏侵尅之弊役困遂蘇俸滿陞刑部郎中未及代卒于州署

王溥

榜名
允澄

字巨川傳次于康熙庚子舉於鄉初授正定知

縣正邑舊徵丁銀每兩加納票錢三分溥至裁之城南為滹沱河水泛溢時往來病涉溥因捐俸造橋春夏水漲則拆橋用舟秋冬水涸則撤舟用橋行旅稱便正定為附郭首邑將弁激變營兵時郡守公出內訌外譁幾

致不測溥單騎往諭責以大義卒還拜風散以行取陞
戶部主事擢思恩府理苗同知署平樂府事尋署桂林
郡篆值頑苗蠢動督撫委溥監紀軍務分兵剿撫擴桑
江苗疆八百餘里建城設堡閱歲三月而定陞太平府
知府會九卿保舉堪勝御史之任者溥為司寇馬爾泰
所薦將入臺遭內艱歸溥軀幹魁梧以督兵深入觸冒
烟瘴歸而體痿服闋卒年僅四十六

武功 義勇附

鄱依山阻水為歷代併豫章者所必爭而武功鮮聞非獨興王隔越望絕從龍亦人安耕鑿無呂蒙脫誤有功之意耳梅將軍銷與亡秦之烈著聲鄜析而桑梓不傳其伐林士弋乘間發難氣懾獨夫雖聚族捍寇志遜於田疇而為賢驅除迹伴於陳涉俾與袁甯諸人同列義勇亦不沒其實也洎乎明初太祖自金陵取隆興鄱介其間一時結里閉相保者咸以鐵馬金戈光分取日效忠致死聲施到今雖無裂土之榮視彼槁項黃馘好亂樂祓者其識量遭際何如也若夫江河既決一蒿思障事雖無成志則可悲亦載筆所不忍棄例而收之未為不幸矣

鄱陽縣志

卷十三

武功

二十五

明

江春字九齡家鄱之新城鄉都昌其故居也讀書通大義善武事至正末倡義兵保鄉閭壬辰徐壽輝遣項普略陷饒署春為左丞屯都昌香溪壽輝為陳友諒所殺春思報之遂歸太祖除權江南行省左丞隨上克江州豫章諸郡解安豐圍敗友諒於康郎山論功授同知振武衛親軍指揮使司從諸將下秦通湖蘇浙西諸州擒張士誠定河南郡以功拜懷遠大將軍預降幽薊平鴈門

雲中走大同將竹真遂守禦大同同知大同衛世襲遷
同知朔州長淮汀州等衛廣東盜起檄春平之功多回
衛卒歸塋新城鄉無嗣

吳宏字德廣元至正間項普略陷饒州宏受命團結左丞
老老等復饒宏率衆降尋忿其欲殺降者叛去屢敗老
老兵乘勝有饒信屬地稱行省叅知政事鎮饒州會明
太祖追陳友諒駐兵江州宏謂幕下曰番君初任秦既
而仕楚仕漢史臣竟稱以忠吾志決矣遂遣部下趙克
俊奉圖表來歸仍鎮饒州上幸饒嘉宏保障功從鄧院
判取撫州南昌明年從取武昌論功拜中書左丞以弟

鄱陽縣志

卷十三

武功

二十六

吳義吳光失軍期宏以官贖罪降指揮僉事叅贊徐達
狗趙擊燕克代三年謫戍秦州卒宏性孝友自起兵掠
地愛民惜士不贖貨狎色博涉百家詩文有跌宕氣入
朝悉焚屯聚冊籍鄉人德之

徐便字宗文幼嗜詩書習騎射元末兵亂從于光歸明多
謀畫授武略將軍洪武四年渡遼議者以海州牛家莊
為要路宜立寨貯餉便度不可遂寢已而敵果大掠去
衆始服其識焉會敵犯金川調便至蓋牟迎敵度道隘
因積冰成壘斷歸路敵果困大有俘獲及攻破他處堡
寨甚多累功擢明威將軍海州衛指揮僉事調遼東移

鎮廣寧復調開元永樂八年卒詔予傳歸塋於鄱便練
達勇敢詰戎之暇手不釋卷好歌詩每行次輒賦以紀
事子琦襲

汪用字克用以膂力自負隨于光歸明後授昭信校尉定
遼衛百戶征勦每著奇功陞武毅將軍海州衛副千戶
進武略將軍

俞先字仁載魁岸有膽略于光署為元帥同劉彥昂奏表
金陵從克黃梅瑞昌諸縣敗陳友諒八陣軍馬授鷹揚
衛百戶陞武略將軍定遼衛副千戶調守牛家庄敵犯
城禦之沒於陣贈明威將軍指揮僉事

鄱陽縣志

卷十三

武功

二十七

俞韶字九成歸明後同于光鎮饒下豫章武昌鎮禦大同
韶皆與有功擢武略將軍定遼衛副千戶調征開原沒
於陣

方祿明洪武四年以于光舊部曲官百戶階昭信校尉累
以戰功進承信校尉卒子誠嗣改官定遼後衛

俞復亨幼有才略初坐事戍遼東明成祖靖內難以功授
承信校尉旗手衛百戶遷武略將軍副千戶再陞武德
將軍出入禁闈恩遇日隆進明威將軍同知錦衣衛親
軍指揮使司

國朝

洪渙字寧波康熙丙戌武進士任甘肅鎮番衛掌印守備兼管屯事鎮番古姑臧地僻在邊陲庚子歲歉渙竭力捐賑全活無算雍正癸卯涼永番變渙圍練鄉兵千餘為戰守計尋奉委運糧天王嶺木毛山諸營馳驅沙漠不解鞍甲者數月又安插番目折花凌柱沙碼班碼及胡圖圖等共六百餘戶男女數千口教之耕種悉為良民甲辰鎮番改縣因卸衛事復督理柳林湖水利築堤開溝長數十里分列五渠以備旱潦招募墾闢給牛種器械三載得熟地三萬餘畝事竣候補以疾歿于鎮番

義勇

鄯陽縣志

卷十三

義勇

二十六

隋

林士和饒州鄯陽人隋季與鄉人操師乞同起師乞自號元興王大業十三年據豫章以士和為大將軍隋遣劉子翊射殺師乞士和收其眾戰彭蠡子翊敗死遂大振眾十餘萬據虔州自號南越王俄僭號楚稱皇帝任其黨王戎為司空臨川廬陵南康宜春豪傑皆殺隋守令以附北盡九江南番禺悉有之後蕭銑以舟師破豫章士和獨有南昌虔循潮之地銑敗復振武德五年王戎獻南昌地士和遁保安城袁人相聚應之為張善安所察以兵赴討會士和死其黨乃散

唐書

按士知舊列傳志義主尊王白中丞通志從唐書補
入人物志而比之李密王世充竊謂儼尚非倫趙佗
李昇庶乎近之但享國未久耳然崛起一方得保首
領而紮陽綱目無貶辭視項羽陳友諒有加焉

袁贇隋大業間兵亂倡義聚郭內居民相保守操師乞自
新昌來攻城贇不支出居水南童敏故城與張善安大
戰斬獲甚多武德初授懷州刺史

唐

李賡同弟襄聚義兵拒黃巢保饒歙二州以功官御史大
夫與金日安皆廟食

鄱陽縣志

卷十三

義勇

二十九

宋

周樸字吉甫美髭髯有大志初從學於黃應博又從學於
張采采奇其才處之家塾吉甫以其知己事之不去時
盜起江湖間州將以采知兵使督州兵討之盜有張家
僮率衆掠邑里采將攻之而賊先發遂遇害吉甫走告
州將曰張提督為賊所殺諸子皆幼吾當為師復讐禮
報讐不書於士則有罪不敢不告也州將義之授以兵
兵寡議者勸募兵吉甫曰我募而衆彼益衆矣不若出
其不意亟擊之即擣賊所賊窮以金擲地兵爭取金賊
脫去吉甫立斬數人以徇慷慨流涕誓不與賊俱生衆

感動願效死力攻一寨破之餘寨皆走乘勝追擊斬首數千生擒僮賊斬之殂其心肺為文祭其師時境內賊柵數十悉平元兵至州將唐震死之衆勸吉甫降太守可得吉甫曰吾為師復讎而已他豈所望哉即日散遣所部隱居不復言功名景定元年八月沐浴別親友索歷擇日端坐而卒長子暉元至正進士應奉翰林同知制誥兼國史編修

元

胡振祖字振卿元至正壬辰兵起人多附之振祖獨毅然樹義旗糾鄉民為保障計明年平章三旦八以官軍駐

鄱陽縣志

卷十三

義勇

三十

饒元帥韓邦彥為前鋒振祖往迎為鄉導遂復饒城以便宜假振祖同知浮梁州又明年復假判饒斬兵再至元院判哈迷遁退保德興振祖率兵轉戰過歙寇汪童衆數萬乃營大游山拒之相持兼旬累戰不利馬蹶被擒誘以降振祖曰吾為國以義保民身可死勝不可屈因給冠置酒連酌至微酣奪戟刺殺數人而死時丙申九月也子節字叔儀洪武間舉賢才官慶元知縣力請名公表揚父義母節周伯琦為書大雅堂宋景濂為之記何椒邱序費鵠湖賦見藝文曾孫韶另有傳按新安程望潔

辨汪童本作同婺源人元季起義兵擇州里歷官濠南行省左丞以忠勇聞為張士誠所害先是丙申九

月同率眾二萬破鳳遊山諸砦直抵浮梁將乘勝取饒城主將忌其成功乃退而振祖傳云云蓋鄱歙兩軍倉卒相遇互疑為陳友諒黨而殘之甚矣其為不可贖之憾也 劉司空原跋

劉明字衮明生而英偉好讀書有鄉里譽元季壬辰斬兵寇饒明糾集鄉民以義勇相保守官軍東來為嚮導克復郡邑總兵三旦八屢加褒賞運糧開道遇賊力戰錄功授浮梁州判官從征信陽病亟諭左右曰所恨者殘寇未滅不能盡忠於國耳言訖而逝翰林待制李燦銘其墓

明

劉勳字彥輔元季兵起倡義旗至正辛丑隨守將于光以

鄱陽縣志

卷十三

義勇

三十一

兵從太祖征九江斬黃克台明定蘭秀山鎮閩中移鎮潮陽未幾卒

屈任字濟民元末紅巾倡亂任與弟直中暨同里操守義輩糾集鄉民保障寇至挺身抗鋒鏑力屈被擒賊帥迫之從任曰棄母之養從汝強賊天地神祇所不容賊帥曰義士也釋之

國朝

童明道及子蘭生俱明文學金聲桓之變父子起兵明道被獲蘭生益勵志圖報父仇招之降不聽卒慷慨受刃死同時文學廉質字互子明海門令栻之子有勇力亦

起兵戰死於萬年其妻包氏投井死另見烈婦傳

鄱陽縣志

卷十三

義勇

三十一

